

四庫全書

史部

欽定四庫全書

欽定續通志五百九十八

載記

五

南漢

劉隱

龔

玢

晟

鉉

附

龔澄樞

李托

潘崇徹

劉隱蔡州上蔡人祖安仁商賈南海因家焉

按宋史作仁安仕唐

為潮州刺史  
國家顯表

父諫

唐書作  
知諫

為廣州牙將唐乾符五年黃

巢破廣州略湖湘間謙據有封州詔即授為刺史賀江  
鎮遏使禦梧桂以西歲餘有兵萬人戰艦百餘艘謙卒  
清海軍節度使劉崇龜表隱為封州刺史乾寧中崇龜  
死薛王知柔代為帥未至廣州將盧琚單玘作亂知柔  
不敢進隱以兵攻殺琚玘迎知柔知柔辟為行軍司馬  
其後徐彥若代知柔表隱節度副使委以軍政彥若卒  
軍中推隱為留後

按宋史云彥若遣表薦隱自代昭宗  
不從以崔遠代之遠至江陵遷延不

進乃以隱  
為留後

時虔州盧光稠據州自為留後兼取潮韶二

州隱與之爭戰不利乃悉師攻虔州伏發隱大敗

按劉  
隱攻

虔詔事歐史失載  
今據新唐書補輯

天祐二年拜隱為廣州節度使梁開

平三年累加檢校太師兼中書令封南平王隱父子起

封州數有功於嶺南遂有南海隱復好賢士時中朝人

士往往辟亂嶺表名臣謫死南方者皆有子孫在焉其

仕宦遭亂不得還者亦多流寓王定保倪曙劉濬李衡

周傑楊洞潛趙光胤之徒辟置幕府待以賓客乾化元

年封南海王

按通鑑及東都事畧無封南海王事宋史  
但云開平初封隱南海王無初封南平王

事五代會要又云開平四年四月進封南海王均與歐史異

卒追尊曰襄皇帝廟號

烈宗

龔初名巖又更名陟謙庶子也其母段氏生龔於外舍  
謙妻帝氏素妬拔劍而出將殺之及見而異之曰此非  
常兒也後三日卒殺其母自養為子龔長善騎射隱為  
行軍司馬辟薛王府諮議參軍隱鎮南海龔為副使隱  
卒龔代立乾化二年除青海軍節度使末帝即位龔封  
南海王初隱攻韶州龔曰韶州所賴者光稠擊之虔人

必應應則首尾受敵此不宜直攻而可以計取隱不聽  
果敗歸因盡以兵事付龔卒出兵攻敗盧氏取潮韶又  
取容邕二管自梁初隱受封爵及龔嗣立皆稟正朔貞  
元三年龔乃即皇帝位國號大越改元曰乾亨追尊安  
仁謙隱皆為皇帝立三廟置百官以楊洞潛為兵部侍  
郎李衡禮部侍郎倪曙工部侍郎趙光胤兵部尚書皆  
平章光胤自以唐甲族恥事偽國常怏怏思歸龔乃詐  
為光胤手書遣使間道至洛陽召其二子損益并其家

屬皆至光肩驚喜為盡心焉龔性奇酷為刀鋸支  
解剗剔之刑每視殺人則朶頤垂涎不勝其喜又好奢  
侈悉聚南海珍寶以為玉堂珠殿二年祀天南郊大赦  
改國號漢三年冊越國夫人馬氏為皇后四年置選部  
貢舉放進士明經十餘人如唐故事歲以為常七年唐  
莊宗入汴龔懼遣宮苑使何詞入視中國虛實稱大漢  
國主致書大唐皇帝詞還言唐必亂不足憂龔大喜嘗  
自言家本咸秦恥王蠻方呼唐天子為洛州刺史九年

白龍見南宮三清殿改元白龍又更名龔以應龍見之  
祥有言識書滅劉氏者龔也龔乃採周易飛龍在天之  
義為龔字以名焉四年楚以舟師攻封州封州兵敗於  
賀江龔懼以周易筮之遇大有遂赦境內改元曰大有  
遣將蘇章以神弩軍三千往救章以兩鐵索沈賀江中  
為巨輪於岸上築堤隱之因輕舟迎戰陽敗楚人逐之  
章舉巨輪挽索鎖楚舟以彊弩夾江射之盡殺楚人三  
年遣將李守鄺梁克貞攻交趾擒曲承美龔登儀鳳樓



受俘赦之

按十國春秋云史纂左編載梁末交州土豪曲承美據有十二州之地南漢遣將攻承美執之置

交趾節度使又考馭交記但言李守鄜梁克貞取交州不言置交趾節度使未詳孰是克貞又攻占

城掠其寶貨而歸四年愛州楊廷藝叛攻交州刺史李進遜歸龔遣承旨程寶攻廷藝寶戰死五年封子耀樞等十九人皆為王十年交州牙將皎公羨殺楊廷藝自立廷藝故將吳權攻交州公羨來乞師龔欲乘亂取之以子萬王洪操為靜海軍節度使改封交王將兵攻之而自以兵駐海門為援權已殺公羨逆戰海口植鐵楯

海中權兵乘潮而進洪操逐之潮退舟還轆轤者皆覆  
洪操戰死龔收餘衆而還十五年龔卒諡曰天皇帝  
廟號高祖

玠龔子初名洪度封秦王龔子耀樞龜圖皆早死玠次  
當立龔病意欲立洪昌召右僕射王翻至寢中與語翻  
為謀出洪度邕州洪熙容州然後立洪昌為太子議已  
定崇文使蕭益入問疾龔以告之益諫曰少者得立長  
者爭之禍始此矣由是卒立洪度更名玠改元曰先天

尊母趙昭儀為皇太妃以晉王洪熙輔政玠立不能任  
事龔在殯召伶人作樂飲酒宮中裸男女以為樂或衣  
墨線與娼女夜行出入民家山海間盜賊競起推妖人  
張遇賢為帥陷循州玠遣越王洪昌循王洪杲攻之遇  
賢圍洪昌等於錢帛館裨將萬景忻陳道庠力戰挾二  
王潰圍走玠莫能省嶺東皆亂洪熙日益進聲妓誘玠  
為荒恣玠亦頗疑諸弟圖已敕宦官守官門入者皆露  
索洪熙洪杲洪昌陰遣陳道庠養勇士劉思潮譚令裡

等習為角觝以獻玠玠宴長春宮以閱之醉起道庠與思潮等隨至寢門拉殺之謚曰殤

晟初名洪熙封晉王既弑玠遂自立改元曰應乾以洪昌為兵馬元帥知政事洪杲副元帥劉思潮等封功臣晟以弑兄篡立懼衆不服乃益峻刑法以威衆已而洪杲屢請討賊陰勸晟誅思潮等以止外議晟大怒夜召洪杲至殺之冬祀天南郊改元曰乾和二年遣洪昌祠襄帝陵於海曲至昌華宮使盜刺殺之晟自殺洪杲由

是與諸弟有隙而洪昌最賢龔素所欲立者晟尤忌之  
故先及害鎮王洪澤居邕州有善政是歲鳳凰見邕州  
晟怒使人酖殺之諸弟洪雅等終晟之世相次皆見殺  
三年殺劉思潮等五人思潮等死陳道庠懼不自安其  
友鄧伸五國故事  
作鄧申以荀悅漢紀遺之道庠莫能曉伸罵  
曰慈獠韓信誅而彭越醢皆在此書矣道庠悟益懼晟  
聞之大怒執道庠伸皆斬於宇夷其族以右僕射王翻  
嘗謀立越王洪昌出為英州刺史尋賜死於路六年遣

工部郎中知制誥鍾允章求婚於楚楚不許晟怒曰馬  
公復能經略南土乎時馬希廣新立希萼起兵武陵湖  
南大亂允章具言楚可攻狀乃遣巨象指揮使吳玠內  
侍吳懷恩攻賀州克之楚人來救玠鑿大阱於城下覆  
箔而傳以土下施機軸自塹中穿穴通窰中楚兵逼城  
遣人自穴中發機楚人悉陷死者數千人玠等遂乘勝  
攻桂州及連宜嚴梧蒙五州皆克之掠全州而還按通鑑吳  
懷恩等陷楚兵于賀州城下遂進陷昭州此云克  
桂連宜嚴吳蒙全等州而不及昭州歐史失載也  
九年

又遣內侍潘崇徹攻楚郴州與李景兵遇大敗之  
遂取郴州晟益得志故時劉氏宮館凡數百玉清太微  
諸名不可悉紀晟復遣巨艦指揮使暨彥贇以兵入海  
掠商人金帛作離宮日恣游獵宦者林延遇宮人盧瓊  
仙內外用事專為殺戮晟不復省嘗大醉以爪置伶人  
尚玉樓項試劍因并斬其首明日復召玉樓侍飲左右  
白已殺之晟歎息而已十年湖南王進逵以兵五萬率  
溪洞蠻攻郴州潘崇徹與戰於螺石大敗之十一年晟

病甚封其子繼興等五人皆為王十二年交州吳昌濬  
遣使稱臣求節鉞昌濬者權子也權自龔時據交州洪  
操戰死遂棄不復攻至是始稱臣遣給事中李璵以旌  
節招之璵至白州海賊為亂不果行十四年是為周顯  
德三年世宗平江北晟始惶恐遣使修貢為楚人所隔  
使者不得行晟憂形於色又嘗自言知星十六年月食  
牛女間出書占之歎曰吾當之矣因為長夜飲卜葬域  
於城北運甓為壙親臨視之是秋卒謚曰文武光聖明



孝皇帝廟號中宗

銀初名繼興晟卒以長子立改元曰大寶晟惟剛忌不能任臣下而獨任宦官宮婢等至銀尤愚懦以為羣臣皆自有家室顧子孫不能盡忠惟宦者親近可任遂委

政於龔澄樞陳延壽

宋史作陳延受

等澄樞等既專政銀乃與

宮婢波斯女等淫戲後宮不復出省事延壽又引女巫

樊胡子

宋史作樊胡

自言玉皇令其降身命銀為太子皇帝

銀於內殿設帳幄陳珍玩胡子冠遠遊冠衣紫霞裾坐

帳中宣禍福銀再拜聽命由是國事皆決於胡子盧瓊  
仙龔澄樞等爭附之時宮中婦人皆具冠帶領外事內  
官數至七千餘人有為三師三公者但於其上加內字  
別之女官亦有師傅令僕之號羣臣有才畧可備用者  
皆下蠶室令得出入宮闈又作燒煮剝割刀山劍樹之  
刑或令罪人鬪虎抵象又賦斂煩重邕民入城者人輸  
一錢瓊州米斗稅四五錢置媚川都定其課今入海五  
百尺採珠所居宮殿以珠玳瑁飾之陳延壽作諸淫巧

日費數萬金銀游幸離宮嘗至月餘或旬日以豪民為課戶供宴犒之費尚書左丞鍾允章參政事深嫉之數請誅宦官宦官皆仄目二年銀祀天南郊前三日允章與禮官登壇四顧指麾宦者許彥真望見之曰此謀反耳乃拔劍升壇允章迎叱之彥真馳走告允章反銀下允章獄并捕繫其二子族誅之陳延壽謂銀曰先帝所以得傳陛下者由盡殺羣弟也勸銀稍誅諸王乃殺其弟桂王旋興是歲宋建隆元年也銀將邵廷琄言真主

已出其勢非一天下不能已請飭兵備不然悉珍寶奉  
中國遣使通好銀憤然莫以為慮惡其言直深恨之五  
年以宦者李托養女為貴妃專寵托為內太師居中專  
政許彥真既殺鍾允章惡澄樞等居已上謀殺之澄樞  
使人告彥真反族誅之七年宋師克郴州戍將暨彥贊  
刺史陸光圖皆戰死餘衆退保韶州銀始思廷瑁言遣  
廷瑁帥舟兵出洗口以拒宋宋師退舍廷瑁訓士卒修  
戰備嶺人倚以為重有譖者誣以反尋賜死士卒寃之

八年交州吳昌文卒其下爭立交趾大亂驩州丁璉舉兵擊破之即授璉交州節度十三年是為宋開寶三年宋師來討初宋太祖克郴州獲銀內侍余延業太祖問銀為治之迹延業備言其奢酷及銀兵攻道州刺史王繼勲請討之太祖難其事令李煜諭銀使稱臣歸湖南地銀不從煜使三往書辭懇至銀怒囚其使者龔慎儀驛書答煜言甚不遜煜上之乃詔潭州防禦使潘美等出師時銀舊將多以讒構誅死宗室翦滅殆盡掌兵者

惟宦官數輩自晟以來城壁不修兵甲毀壞及聞宋師至內外震恐乃遣龔澄樞守賀州郭崇岳守桂州李托

守韶州以備是歲秋潘美平賀州十月平昭州又平桂

州十一月平連州

按宋史潘美等於十月次昭州破開建砦擒砦將斬暉昭州刺史田行周

逸去城邊陷桂州刺史李承進亦奔遂平昭桂二州至

平連州在十一月平韶州在十二月與十國春秋並同

歐史於十二月書平韶州於十月亦作韶州上下重出顯係昭與韶音形相近而訛今改正

銀喜曰

昭桂連賀本屬湖南今北師取之足矣其不復南也十二月平韶州明年平英雄二州宋師次瀧頭銀遣使請

和求緩師二月宋師度馬迺銀遣其右僕射蕭灌奉表

降灌既行銀惶迫復令整兵拒命美等進師銀遣其弟

祥王保興率文武詣美軍降不納

按宋史銀既遣右僕射蕭灌奉表乞降又

進其弟保興率百官奉迎為郭崇岳所遏崇岳無謀勇但祈求鬼神復為拒捍之備美等乃進攻是保興本未出降非美等不納也與歐史異 師傳城龔澄樞李托薛崇譽等謀盡焚

其府庫宮殿銀以海舶十餘載珍寶嬪女將入海宦官

樂範竊其舟以逃師次白田銀素衣白馬以降乃并其

宗室文武部送闕下

按宋史城既破銀盡焚其府庫美擒範及龔澄樞李托薛崇譽與宗

宦文武九十七人同席於龍德宮是  
斬閹工五百餘人  
張窮威被擒非自出降亦與歐史異

有司以帛繫銀獻廟社宋太祖御明德門宣詔責銀銀  
委過於龔澄樞李托薛崇譽等伏他待罪釋銀封恩赦  
侯其弟保興及蕭淮等並授官有差銀有口辨性絕巧  
嘗以珠結鞍勒為戲龍之狀以獻極其精妙太祖詔示  
諸官官皆駭伏因語左右曰銀儻能以習巧之勤移於

治國豈至滅亡哉太平興國五年卒追封南越王

徐無黨曰

隱興滅年世諸書皆同蓋自唐天祐二年隱為廣州節  
度使至宋開寶四年國滅凡六十七年舊五代史以梁



貞明三年龔僭號為  
始故曰五十五年爾

龔澄樞廣州南海人幼事龔為內供奉官累遷內給事  
晟龔位任閹人林延遇為甘泉宮使頗預政事延遇病  
將死言於晟曰臣死惟龔澄樞可用即日擢知承宣院  
銀嗣位累加特進開府儀同三司驃騎上將軍左龍虎  
軍觀軍容使內太師軍國重務皆決於澄樞澄樞等與  
女巫樊胡子相倚為姦胡子乃與銀言澄樞等乃上天  
使來輔太子有罪不可問澄樞因與李托薛從譽置醕

法之具民甚苦之初巖改名龔有術者言不利名龔當敗國事後龔用澄樞卒以其姓亡國澄樞亦執送汴京斬於千秋門外

李托封州封川人少習騎射以謹愿事龔為內府局令歲龔位遷內侍省內侍龔立以托進納二女政事皆訪托而後行累加特進開府儀同三司兼六軍觀軍容使行內中尉驃騎上將軍內太師宋師既克韶州統軍使李承渥戰死節度副使辛延渥間道遣人勸龔降托堅

沮其議及就擒宋太祖遣使問托等昨已約降復率衆來拒戰及軍敗又縱火焚庫府誰為之謀托俛首不能對諫議大夫王珪謂曰昔在廣州機務並爾輩所專火又自內起今復欲推過何人遂唾而批其頰托引伏後

至京與薛崇譽同被戮

按宋史此下有薛崇譽傳無事跡可錄今從刪

潘崇徹廣州南海人事龔為內侍省局丞頗讀兵書立戰功晟遣大將吳懷恩平桂州懷恩為部下所殺命崇徹代之銀立加西北面都統歲餘銀頗疑崇徹遣薛崇

譽使其軍察之崇譽還遂白崇徹日以伶人百餘衣錦  
繡吹玉笛為長夜飲不恤軍政銀怒召歸奪其兵柄自  
是居常怏怏宋師入境復命崇徹領兵五萬戍賀江崇  
徹不為効命擁衆自保潘美克英雄二州崇徹遂降宋  
太祖特赦之授汝州別駕卒

欽定續通志卷五百九十八

欽定四庫全書

欽定續通志五百九十九

載記六

楚

馬殷

希聲

希範

希廣

希萼

希崇

附

劉言 王進達

周行逢

馬殷字霸圖許州鄆陵人

按通鑑作扶溝人三楚新錄作上蔡人

唐中和

三年蔡州秦宗權遣孫儒劉建鋒

按歐史作建鋒新唐書作建鋒考建鋒字

銳端當從新書改正

將兵萬人屬其弟宗衡略地淮南殷初為儒

裨將儒敗死殷等無所歸乃收散卒轉寇江西有衆七

千

按新唐書劉建鋒傳作略洪虔數州有衆十餘萬

推建鋒為帥殷為先鋒略

虔吉有衆數萬乾寧元年入湖南攻澧陵潭州刺史鄧

處訥遣邵州將蔣勛等以兵三千斷龍回關勛以牛酒

犒師殷說勛曰劉公勇智絕人精兵十萬所向必克公

集鄉兵捍關殆矣不如下之富貴可得也勛然之又其

下畏建鋒虐夜棄甲走建鋒至關取勛旗鎧直趨潭州

至東門守者以為勛兵內之遂殺處訥建鋒自稱留後

僖宗授建鋒湖南節度使

按新唐書作檢校尚書左僕射武安軍節度使殷為

馬步軍都指揮使蔣勛求為邵州刺史建鋒不與勛怒

率兵攻湘鄉取邵州進攻定勝武安殷以奇兵出迪田

踰澗山據江為壁誘勛渡江分兵襲定勝麾瀕江兵夾

擊勛大敗之

按馬殷取潭州及攻邵州事跡最著歐史畧之今據新唐書補輯

建鋒已

得志即嗜酒不事事軍卒陳贍妻有色建鋒私之贍怒



袖鐵槌擊殺建鋒軍中推行軍司馬張佖為帥佖將入府馬忽蹉齧傷左髀佖語諸將曰吾非而主也馬公英勇可共立之諸將乃共迎殷礫贍於市時乾寧三年也唐拜殷潭州刺史判湖南軍府事殷遣其將秦彥暉李瓊等攻下連邵柳衡道永六州擒蔣勛殺之進攻桂管執其留後劉士政盡取其屬州表瓊為桂管觀察使四年拜殷武安軍節度使

按通鑑及十國春秋作乾寧四年二月張佖克邵州擒蔣勛殺

之光化元年三月拜殷武安軍留後未幾進本軍節度使其攻下連柳衡道永五州及攻桂管執劉士政皆光

化三年以前事歐史作乾寧四年殷拜武安節度又載  
攻連柳衡道永桂管等事於乾寧四年之前與諸書不

合初孫儒敗於宣州殷弟實為楊行密所執署為黑雲

都使從戰數有功行密聞殷貴乃厚禮遣歸殷大喜表  
為節度副使行密遣劉存等攻杜洪圍鄂州殷遣秦彥  
暉許德勳以舟兵救之已而洪敗死存等遂攻殷殷遣  
彥暉拒於上流偏將黃璠以舟三百伏瀏陽口存等屢  
戰不勝來求和不許彥暉等急擊之存等走黃璠以瀏  
陽舟截江合擊大敗之劉存及陳知新戰死彥暉遂取

岳州

按通鑑及編遺錄十國春秋俱云彥暉與瑤大破劉存揔存及陳知新以歸殷釋其縛不屈乃趣斬

之歐史作戰死又薛史梁紀馬殷破淮寇在開平元年六月十國紀年吳紀劉存攻楚在開平元年五月敗在六月梁太祖即位及封殷楚王乃四月也歐史載此事在梁祖未即位前與諸書異梁太祖即位

殷遣使修貢拜殷侍中兼中書令封楚王楊行密袁州

刺史呂師周來奔師周將家子頗通緯候兵書殷得之

大喜曰吾方南圖嶺表得此人足矣以為馬步軍都指

揮使率兵攻嶺南取昭賀梧州蒙龔富等州殷即表為昭

州刺史遣秦彥暉攻朗州刺史雷彥恭奔吳執其弟彥

雄等送於梁於是澧州向瓌辰州宋鄴淑州昌師益等  
率溪洞諸蠻皆附於殷殷請升朗州為永順軍表張佖  
為節度使復請依唐太宗故事開天策府置官屬梁太  
祖拜殷天策上將軍殷以其弟實為左相存為右相廖  
光圖等十八人為學士末帝時加殷武安武昌靜江寧  
遠等軍節度使洪鄂四面行營都統唐莊宗滅梁殷遣  
其子希範入貢上梁所授都統印莊宗問洞庭廣狹希  
範對曰車駕南巡纔堪飲馬爾莊宗平蜀殷大懼表求

致仕莊宗下璽書慰勞之殷初兵力尚寡與楊行密成  
訥劉襲等為敵國殷患之問策於其將高郁郁曰荆南  
闇弱焉能患我劉襲志在五管而已淮南戎讐也固不  
吾援然尊王仗順霸者之業也今宜內奉朝廷以求封  
爵而外誇隣敵然後退修兵農畜力而有待爾於是殷  
始修貢京師然歲貢不過所產茶茗而已殷自京師至  
襄唐郢復等州置邸務賣茶其利十倍又鑄鉛鐵錢以  
十當銅錢一又令民自造茶通商而收其算歲入萬計

由是地大力完數邀封爵天成二年請建行臺明宗遣  
尚書右丞李序以竹冊封為楚國王殷以潭州為長沙  
府建國承制置官屬以其弟賓為靜江軍節度使子希  
振武順軍節度使希聲判內外諸軍事姚彥章為左相  
許德勲為右相李鐸為司徒崔頴為司空拓跋常為僕  
射馬珙為尚書文武皆進位諡其曾祖筠曰文肅祖正  
曰莊穆父元豐曰景莊立三廟於長沙長興元年殷卒  
詔諡武穆

希聲字若訥殷次子殷建國高郁數教以計策而楚以  
彊荆南高季昌聞而患之嘗使謀者行間於殷殷不聽  
希聲用事謀者語希聲曰季昌聞楚用高郁大喜以為  
亡馬氏者必郁也希聲遽奪其兵職矯殷令殺之殷老  
不復省事郁死之日大霧四塞殷怪之語左右曰吾嘗  
從孫儒儒每殺不辜天必大霧豈馬步獄有冤死乎明  
日吏以狀白殷拊膺大哭曰吾荒耄如此亦不久於世  
矣明年殷卒希聲立授武安靜江等軍節度使希聲嘗

聞梁太祖好食雞慕之乃日烹五十雞以供膳葬殷上  
潢不入泣頓食雞肉數器而起長興三年卒追封衡陽  
王

希範字寶規殷第四子殷子十餘人嫡子希振長而賢  
次希聲與希範同日生希聲母袁夫人有美色以母寵  
得立希振棄官為道士故希聲卒而希範以次立襲殷  
官爵封楚王晉天福四年加希範天策上將軍開封承  
制如殷故事希範好學而性奢侈廖光圖徐仲雅李臯



拓跋常等十八人皆故殷時學士光圖等俱浮薄嘗與  
希範飲博譴呼獨常沈厚長者上書切諫光圖等惡之  
溪州刺史彭士然率錦獎諸蠻攻澧州希範遣劉勅劉  
全明等擊敗之遂攻溪州士然走遣其子師嵩率諸蠻  
酋降於勅溪州西接牂牁兩林南通桂林象郡希範乃  
立銅柱為表命學士李臯銘之於是南寧州蠻莫彥殊  
都雲蠻尹懷昌牂牁蠻張萬濬皆率其部來附希範作  
會春園嘉宴堂其費鉅萬始加賦國中拓跋常切諫又

作九龍殿以沈香為八龍繞柱自言身一龍也時契丹方滅晉牙將丁思艷諫曰先王起卒伍以攻戰而得此州倚朝廷以制隣敵傳國三世有地數千里養兵十萬今中國無主真霸者立功之時誠能悉師倡義桓文之業也奈何耗國用而窮土木為兒女子之樂乎希範謝之思艷瞋目視之曰孺子終不可教也乃扼喉而死開運四年希範卒諡曰文昭

希廣字德丕希範同母弟希範惡拓跋常數諫諍乃謝

絕之及卧病始思其言為忠召之以託希廣希範卒常  
勸希廣讓位於兄希萼希廣不從時希萼為朗州節度  
使聞希範卒來奔喪希廣用劉彥瑫言遣都指揮使周  
廷誨將水軍逆希萼於硤石令將士釋甲而後入廷誨  
與張少敵白希廣曰王能與之則已不然宜早除之希  
廣泣曰吾兄也焉忍殺之分國而治可也乃止之於碧  
湘宮厚賂遣歸希萼憤去乃遣使詣京師求封爵請置  
邸稱藩漢隱帝不許降璽書慰解之希萼怒送款於李

景舉兵攻長沙希廣遣劉彥瑫許可瓊等禦之彥瑫敗  
希萼於僕射洲希萼去誘溪洞諸蠻寇益陽希廣遣崔  
洪璉以步卒七千屯湘鄉玉潭以遏諸蠻劉彥瑫以舟  
兵趨武陵攻希萼彥瑫敗於湄洲希廣大懼遣使請兵  
於京師不應希萼率舟兵沿江而上自號順天將軍  
作順天王攻岳州刺史王贛拒之五日不克希萼引兵去下  
湘鄉至長沙與彥瑫可瓊等軍夾水而屯彭師壽登城  
望水西軍入白希廣請以步兵三千自巴溪渡江趨岳

麓後與彥瑫等腹背夾擊之希廣以為可而可瓊已陰  
送款希萼遂沮其議明日師鬪聞之急白希廣請殺可  
瓊不聽希萼攻長樂門牙將吳宏楊滌戰于門中希萼  
少衄可瓊等按兵不戰已而舉全軍降於希萼宏滌等  
聞之皆潰希廣率妻子匿於慈堂明日被擒希萼欲活  
之其下不可遂縊殺之先是左司馬希崇常為希萼詞  
希廣語言動作悉以告之約為內應至是率將吏詣希  
萼勸進

按通鑑希萼還朗州時希崇密與通約為內應  
希萼之攻潭州希崇啓之也至是又率將吏勸

進希廣之亡希崇實與有力歐史於希  
崇通希萼事俱失載今據通鑑增輯 乾祐三年希萼

自立明年漢隱帝崩京師大亂希萼遂臣於李景景冊封  
希萼楚王希萼悉以軍政委希崇希崇與楚舊將徐威  
陸孟俊魯綰等謀作亂希萼置酒端陽門希崇辭以疾  
威等縱惡馬十餘匹以壯士執樞隨之突入其府劫庫  
兵縛希萼遂迎希崇立之希崇遣彭師曷廖偃囚希萼  
於衡山師曷即奉為衡山王臣於李景希崇懼亦請命  
於景景遣邊鎬入楚盡遷馬氏之族於金陵時周廣順

元年也景復希萼楚王居洪州希崇領舒州節度使居揚州周世宗征淮下揚州詔撫馬氏子孫已而揚州復入於景希崇率其弟希能等十七人歸京師皆拜官有

差徐無黨曰殷自唐乾寧二年入湖南至周廣順元年國滅凡五十七年希萼希崇之亂南唐盡遷馬氏之族於金陵五代舊史云時廣順元年也而運曆圖云乾祐二年馬氏滅者繆矣初殷入湖南掘地得石識云龍起頭猪犴尾蓋殷以乾寧三年歲在丙辰自立於湖南至廣順元年辛亥而滅九國志以乾祐三年為辛亥湖湘故事以顯德元年為辛亥者皆繆也惟五代舊史得其實云

劉言吉州廬陵人王進達

通鑑作王達

武陵人言初事刺史

彭玕從玕奔楚事希範為辰州刺史進達少為靜江軍  
卒事希萼為指揮使希萼攻希廣以進達為先鋒陷長  
沙長沙遭亂殘毀希萼使進達以靜江兵營緝之兵皆  
愁怨進達遂擁兵斬關奔歸武陵希萼方醉不能省明  
旦遣將唐肅追及之與戰大敗而還進達乃逐留後馬  
光惠迎言於辰州以為帥而自為副已而希萼被囚希  
崇立李景遷馬氏族并召言言不從遣進達與行軍司  
馬何景真等

通鑑及十國紀  
年作何敬真

攻邊鎬於長沙鎬敗走廣



順三年言奉表京師以邀封爵又言長沙殘破不可居請移治武陵周太祖從之乃升朗州為武平軍在武安軍上以言為節度使而以武安授進達進達以言已所迎立不為之下二人始有隙進達謀曰言將可用者不過何景真朱全瑋爾召殺之言可取也時劉晟取楚梧州宜蒙等州進達因白言令景真等會兵攻晟言信之遣二人往至皆見殺乃舉兵襲武陵執言殺之奉表京師周太祖即以為武平軍節度使世宗征淮南授為南

面行營都統攻鄂州過岳州刺史潘叔嗣進達舊同列也進達左右求賂於叔嗣不得乃共讒其短進達面罵之叔嗣慙恨進達入鄂州方攻下長山叔嗣以兵襲武陵進達聞之輕舟而歸與叔嗣戰城外進達敗見殺按通鑑考異載廣本云達命行營副使毛立為袁州行營統軍使潘叔嗣張文表為前鋒次醴陵縣吏請具牛酒犒軍立不許叔嗣等因士卒怒以兵叛達達乘輕舟奔朗州叔嗣追至朗殺之又湖湘故事云達攻袁州叔嗣叛聞達走歸朗州遂自潭州倍程至朗殺之馬氏行年紀云達三月至潭州四月叔嗣叛五月五日殺達於朗州諸說多不足據惟十國紀年為得其實紀年所載與歐史同

周行逢武陵人少無賴犯法配隸鎮兵與王進達俱為靜江軍卒事希萼為裨校進達攻邊錫行逢別破益陽殺李景兵二千餘人擒其將李建期進達為武安軍節度使拜行逢潭州行軍司馬領集州刺史未幾進達襲殺劉言據武陵行逢遂據潭州顯德元年拜行逢武清軍節度使權知潭州軍府事潘叔嗣既殺進達還岳州遣客將李簡迎行逢於潭州行逢入武陵召叔嗣為行軍司馬叔嗣稱疾不至行逢乃陽以武安與之召使至

府受命至則殺之以徇世宗遂授行逢朗州大都督武  
平軍節度使盡有湖南之地宋初加兼中書令行逢在  
鎮儉約自勵辟署官屬必取廉介士有女壻求補吏不  
許反給耒耜語之曰汝才不任職姑歸墾田以自活其  
公正多類此然性猜忌果於殺戮大將十餘人謀為亂  
行逢召宴酒半悉令壯士擒斬之民過無大小皆死妻  
嚴氏諫

按宋史及三楚新錄作潘氏通鑑作鄧氏惟九國志作嚴氏與歐史同

不聽因不

樂留府署給行逢曰家田佃戶以公貴頗不力農多恃

勢侵民請往視之至則營居以老歲時衣青裙押佃戶  
送租入城行逢往勞且止之嚴氏曰公思作戶長時乎  
租後時常苦鞭扑今貴矣宜先期以率衆行逢彊留之  
因曰公用法太嚴而失人心所不欲留者一旦禍起田  
野間易逃死爾行逢為之少損建隆三年行逢病革召  
將吏以子保權屬之曰與吾同起者十人皆誅死惟衡  
州刺史張文表獨存吾死文表必叛當以楊師璠討之  
如不能則嬰城勿戰自歸朝廷行逢卒子保權立明年

春文表果叛攻下潭州保權命楊師璠討文表至平津  
亭文表出戰大敗之別遣使乞師於朝廷宋太祖遣慕容  
延釗等將步騎往未至而文表為師璠所殺延釗兵  
入朗州保權牙校張從富輩以為文表已平而王師繼  
進不已懼其圖己因相與拒守延釗遣使安撫復不內  
延釗以聞太祖遣中使諭之曰爾乞師救援今反拒王  
師何也毋自取滅亡保權不聽軍澧州南未及交鋒而  
潰退保朗州焚其廬舍府庫畧盡驅民亡竄山谷城郭

一空宋師傅城其將汪端劫保權并家屬奔匿山洞數月搜獲之湖湘悉平時有李觀象者行逢辟為掌書記頗加信任軍府之政一以取決臨終託以後事及宋師壓境謂保權曰我所恃者北有荆渚以為唇齒今高氏拱手聽命朗州勢不獨全莫若幅巾歸朝猶可不失富貴保權不能用卒及於敗保權至京師優詔釋之授右千衛上將軍雍熙二年卒

欽定續通志卷五百九十九

欽定四庫全書

史部

欽定續通志卷

六百五  
至

侍講學士<sub>臣</sub>羅國俊覆勘

總校官原任侍講<sub>臣</sub>王燕緒



欽定四庫全書

欽定續通志卷一百

載記

吳越

錢鏐

元瓘

佐

侖

俶

附惟濬

惟治

孫承祐

沈承禮

錢鏐字具美杭州臨安人里中有大木鏐幼時與羣兒戲木下鏐坐大石指麾羣兒為隊伍號令頗有法羣兒

皆憚之及壯不事生業以販鹽為盜縣錄事鍾起有子數人與鏐飲博起嘗禁之豫章人有善術者望牛斗間有王氣乃之臨安以相法隱市中陰求其人起與術者善一日過起家鏐適從外來見起反走術者望見之大驚曰此真貴人也召鏐至熟視之乃慰曰子骨法非常願自愛因與起訣去起始縱其諸子與鏐遊時貸其窮乏鏐善射與槊稍通圖緯諸書唐乾符二年浙西鎮遏使王郢作亂石鏡鎮將董昌募鄉兵討賊表鏐為偏將

擊郢破之時黃巢攻掠浙東至臨安鏐以勁卒二十人  
伏山谷中巢先鋒度險皆單騎鏐伏弩射殺其將巢兵  
亂鏐引勁卒蹂之斬首數百級乃引兵趨八百里八百  
里地名也告道旁媼曰後有兵至告曰臨安兵屯八百  
里矣巢衆至聞媼語不知其地名皆曰嚮十餘卒不可  
敵况八百里乎遂急引兵過都統高駢聞而壯之召董  
昌與鏐俱至廣陵久之不見用辭還駢表昌杭州刺史  
鏐都知兵馬使

按吳越備史及十國春秋廣明二年九月詔授鏐都知兵馬使與授董昌杭州

刺史同時歐史  
失載今據補

時天下已亂昌乃團諸縣兵為八都以

鏐為都指揮使

按新唐書周寶傳寶發杭州兵戍縣鎮判八都石鏡都董昌主之清平都陳晟

主之於潛都吳文舉主之鹽官都徐及主之新登都杜稜主之唐山都饒京主之富春都文禹主之龍泉都凌文舉主之各聚千人保鄉里吳越備史亦云廣明元年僖宗入興元杭州始建八都臨安縣則董昌主之鏐為副非昌始團諸縣兵為八都也並不載鏐為都指揮使事中和二年越州觀察使劉

漢宏與昌有隙遣其弟漢宥都虞候辛約屯兵西陵以圖浙西鏐率兵渡江襲破之漢宏復遣將黃珪何肅屯諸暨蕭山鏐攻破之與漢宏戰又大敗之殺何肅辛約

漢宏遜四年僖宗遣中使焦居璠為杭越通和使詔罷  
兵皆不奉詔漢宏遣其將朱褒韓公玖施堅實等以舟  
兵屯望海鏐出平水成及夜率奇兵破褒等於曹娥埭  
進屯豐山堅實等降進拔越州漢宏走台州刺史杜旌  
執送於鏐斬于會稽族其家鏐乃奏昌代漢宏而自居  
杭州光啓三年拜鏐左衛大將軍杭州刺史時淮南大  
亂六合鎮將徐約攻取蘇州潤州牙將劉浩等逐其帥  
周寶寶奔常州浩推度支催勸官薛朗為帥鏐遣都將

成及杜稜等攻常州取周寶以歸鏐具軍禮郊迎館於

樟亭寶病卒

按新唐書僖宗本紀光啓三年十月丁卯鏐殺周寶寶傳亦云鏐具橐韃迎寶館於

樟亭未幾殺之與歐史異以杜稜守常州進攻潤州逐劉浩執朗剖

心以祭寶以阮結守潤州又遣其弟鍊攻徐約約走入

海追殺之昭宗拜鏐杭州防禦使時楊行密孫儒爭淮

南與鏐戰蘇常間後儒為行密所殺行密據淮南取潤

州而鏐亦取蘇常

按唐本紀鏐陷常州在光啓三年陷潤州在文德元年陷蘇州在龍紀元年

年是冬常州入於吳刺史杜稜死之未幾并潤州俱為孫儒所得次年蘇州亦入於吳繼又為孫儒所併至景

福元年蘇州復歸於鏐乾寧三年行密又奪之光化元年復入於越此云行密取潤州而鏐亦取蘇常當在大順景福間但本紀於是時不載鏐取常州事而常州于何時復入越則史亦無明文唐升越州威勝軍以董昌為節度使杭州武威軍拜鏐都團練使以成及為副使景福二年拜鏐鎮海軍節度使潤州刺史乾寧元年加同平章事二年董昌反鏐以反狀聞昭宗詔削昌官爵封鏐彭城郡王浙江東道招討使鏐於董氏有舊恩乃以兵三萬屯迎恩門遣其客沈滂諭使改過昌以錢二百萬犒軍執妖人應智等送軍中自請待

罪鏐乃還兵

按通鑑載乾寧二年二月鏐移書責昌昌不聽乃將兵三萬詣越州城下至迎恩門

昌懼執首謀者吳瑤及巫覡數人送于鏐請待罪鏐引兵還以狀聞四月又表請以本道兵討昌五月詔削昌官爵委錢鏐討之以鏐為浙東招討使吳越備史所載畧同據此則鏐以兵詣越州在未以狀聞之先詔削昌官爵及以為招討使在表

請討昌之後與歐史異

昌復拒命遣其將陳郁崔溫

等屯香巖石侯鏐遣顧全武攻之斬崔溫昌兄子真驍

勇善戰攻之逾年不能克後真為裨將刺羽所譖昌殺

之兵敗全武執昌還及西小江昌投水死

按新唐書董昌傳作全武

執昌還斬之投尸于江吳越備史作全武使上武勇都監使吳璋執昌至斬之與歐史異昭宗乃改



威勝軍為鎮東軍拜鏐鎮海鎮東等軍節度使加檢校  
太尉中書令賜鐵券鏐如越州受命還治錢塘號越州  
為東府光化元年移鎮海軍於杭州加鏐檢校太師改  
鏐所居營曰衣錦營婺州刺史王壇叛附淮南楊行密  
遣其將康儒應之攻睦州鏐遣其弟鉞敗儒於軒渚壇  
奔宣州衢州刺史陳岌來附詔鏐圖凌煙閣升衣錦營  
為衣錦城天復二年封鏐越王鏐巡衣錦城武勇都指  
揮使徐綰許再思叛顧全武曰綰急必召淮兵淮兵至

患不細矣請擇諸公子可行者與俱往以難告楊公必  
能閱我鏐嘗欲以子元璫婚楊氏乃使隨全武如廣陵  
綰果召田頔於宣州全武等至廣陵行密以女妻元璫

亟召頔還頔取鏐錢百萬

通鑑作二十萬緡吳越備史作一百億

質鏐子

元瓘而歸天祐元年封鏐吳王鏐建功臣堂立碑紀功  
列賓佐將校名氏於碑陰者五百人四年升衣錦城為  
安國衣錦軍梁太祖即位封鏐吳越王兼淮南節度使  
客有勸鏐拒命者鏐笑曰吾豈失為孫仲謀邪遂受之

鏐好玉帶名馬大祖以玉帶一匣打毬御馬十匹賜之  
開平二年加守中書令改臨安縣為安國縣三年加守  
太保楊渥將周本陳章圍蘇州鏐遣其弟鋸鏢救之淮  
兵為水柵環城以銅鈴繫網沈水中斷潜行者水軍卒  
司馬福多智而善水行先以巨竹觸網淮人聞鈴聲舉  
網福乃過入城中其出也亦然遂取其軍號內外夾攻  
號令相應大敗淮軍本等走擒其將閻丘直何明等乾  
化元年加守尚書令兼淮南宣潤等道四面行營都統

鐸弟鏐居湖州擅殺戍將潘長懼罪奔淮南梁友珪纂  
立冊尊鐸尚父末帝貞明三年加鐸天下兵馬都元帥  
開府置官屬四年楊隆演取虔州鐸始由海路入貢京  
師龍德元年賜鐸詔書不名唐莊宗入洛鐸遣使貢獻  
求玉冊莊宗下有司議羣臣皆謂非天子不得用玉冊  
郭崇韜尤為不可既而許之乃賜以玉冊金印鐸因以  
鎮海等軍節度授其子元瓘自稱吳越國王更名所居  
曰宮殿府曰朝官屬皆稱臣起玉冊金券詔書三樓於

衣錦軍遣使冊新羅渤海王海中諸國皆封拜其君長  
明宗初即位安重誨用事鏐致書辭嫚重誨怒會供奉  
官烏昭遇韓致使吳越還致誣昭遇稱臣舞蹈重誨乃  
奏削鏐王爵以太師致仕元瓘等遣人以絹表間道自  
陳重誨死乃復鏐官爵長興三年卒謚武肅

元瓘字明寶鏐第七子初名傳瓘既立更名元瓘少質  
於田頔頔叛吳楊行密會越兵攻之頔每戰敗歸即欲  
殺元瓘頔母常蔽護之及頔戰死元瓘乃得歸鏐卧病

召諸將告之曰吾子皆愚懦不足任後事惟公等自擇之諸將泣下皆曰元瓘從王征伐最有功諸子莫及請立之鏐乃出莞鑰數篋與之鏐卒元瓘立襲封吳越國王

按薛史清泰初封吳王二年封越王天福三年封吳越國王吳越備史則云應順元年封吳越王清泰初

復冊封天福二年封為吳越國王

玉冊金印皆如鏐故事王延政自立

於建州閩中大亂元瓘遣其將仰詮薛萬忠等攻之逾年大敗而歸元瓘善撫將士好儒學使其國相沈崧置擇能院選吳中文士錄用之然性奢侈好治宮室天福

六年加天下兵馬都元帥

按元瓘加天下兵馬都元帥歐史失載今據薛史補杭

州大火燒宮室殆盡元瓘避之火輒隨發因大懼病狂

而卒謚文穆

佐

表忠觀碑作仁佐

字祐立元瓘第六子時年十三

通鑑作時年十四

諸將皆少佐佐初優容之諸將稍不法佐乃黜其大將

章德安於明州李文慶於睦州殺內都監杜昭達統軍

使闕璠由是國中皆畏恐王延義延政兄弟相攻其將

李仁達等自相篡殺連兵數年仁達附于李景已而又

叛景兵攻之仁達求救於佐佐召諸將計事皆不欲行  
佐遣其統軍使張筠趙承泰等率兵三萬水陸赴之大  
敗景兵獲其將楊業蔡遇等遂取福州而還佐立七年  
襲封吳越國王開運四年卒謚忠獻

表忠觀碑  
作忠顯

侂字隆道元瓘第七子初元瓘質於宣州以胡進思戴  
憚等自隨後用進思等為大將佐年少以進思舊將甚  
見尊禮及侂立頗卑侮之進思不能平侂大閱兵於碧  
波亭方第賞進思諫以頒賞太厚侂怒擲筆水中曰以



物與軍士吾豈私之何見咎也進思大懼歲除畫工獻  
鍾馗擊鬼圖侔以詩題圖上進思見之悟侔將殺已是  
夕擁衛兵廢侔囚於義和院迎其弟俶立之遷侔於東  
府居越州二十餘年卒謚忠遜

按歐史不載侔謚今據  
吳越備史及十國春秋

補

俶字文德元瓘第九子歷漢周襲封吳越國王顯德元  
年授天下兵馬都元帥世宗征淮南詔俶攻常宣二州  
以牽李景俶治兵以待景聞周師將大舉乃遣使安撫

境上皆戒嚴蘇州候吏陳滿不知景使謂朝廷已克諸州遣使安撫亟言於俶請舉兵以應俶相國吳程遽調兵出程等攻常州果為景將柴克宏所敗程裨將邵可

遷力戰程等僅以身免

按宋史顯德三年世宗征淮南令俶以所部分路進討俶遣偏

將吳程圍毘陵陷闕城禽刺史趙仁澤路彥銖圍宣城俄俶軍戰敗復失常州十國春秋亦云顯德三年三月程等先克常州至壬子始為柴克宏所敗乙卯路彥銖攻宣州不克聞程敗乃引還周師渡淮俶

乃盡括國中丁民益兵使邵可遷等以戰船四百艘水軍萬七千人至通州會期世宗已平淮南遣使賜俶兵

甲旗幟橐駝羊馬宋太祖即位仍授為天下兵馬大元帥錢氏兼有兩浙幾百年其人比諸國怯弱而俗喜淫巧自鏐世常重斂其民以事奢僭人不堪其苦又多掠得嶺南商賈寶貨當五代時常貢奉中國不絕及宋興倣益傾國以事貢獻乾德元年遣子惟濬入朝尋又遣幕吏黃夷簡入貢太祖諭之曰歸語而主常訓練兵甲江南倔强不朝我將發師討之元帥當助我又命有司造大第於薰風門外賜名禮賢宅供帳悉具召進奉使

錢文贊示之曰以待李煜及而主先來朝者賜之令諭

旨於俶開寶七年冬討江南以俶為昇州東面招撫制

置使

吳越備史作東南面招討制置使

時李煜貽書諷俶丞相沈虎子

亦勸俶毋攻江南皆不聽以煜書上聞即親率師拔常

州加守太師詔歸國乃遣大將沈承禮等隨宋師平金

陵九年二月俶與妻孫氏子惟濬入朝太祖先臨禮賢

宅按視及至詔俶居之太祖屢幸其第特賜劍履上殿

書詔不名封其妻孫氏為吳越國王妃先後賜予數十

萬以四月歸國陞辭日賜一黃袱封識甚固戒以塗中  
密視及啓之則皆羣臣乞留俶章疏也俶甚感懼既歸  
嘗視事功臣堂一日命坐於東偏謂左右曰西北者神  
京在焉天威不遠顙咫尺俶豈敢寧居乎太平興國三  
年復來朝宴俶長春殿命劉鋹李煜預坐會陳洪進納  
土俶上表乞罷所封吳越國王及元帥號并請詔命呼  
名不許俶又表懇獻所管十三州於闕下詔可乃封為  
淮海國王以禮賢宅賜之子姪將校並授官有差其後

劉繼元降帝御連城臺顧謂俶曰卿能保全一方以歸  
於我兵不血刃深可嘉也俶頓首謝八年冬累章乞解  
元帥號允之雍熙元年改封漢南國王四年出為武勝  
軍節度使改封南陽俶四上表讓國王乃改封許王端  
拱元年徙封鄧王卒追封秦國王謚忠懿命中使護其  
喪歸塋洛陽

徐無黨曰錢世興滅諸書皆同蓋自唐乾  
寧二年為鎮海鎮東軍節度使兼有兩浙

至太平興國三年

國除凡八十四年

惟濬字禹川俶嫡子表授鎮海鎮東兩軍節度副大使

檢校太保建隆初領建武軍節度使自乾德元年來朝  
後數歲率一赴闕開寶二年授鎮東等軍節度使太祖  
嘗召宴苑中令與諸王同席坐從征金陵攻下毗陵以  
功加平章事太宗即位加兼侍中比倣盡獻浙右地徙  
鎮淮南加檢校太師後平太原征幽薊皆在兵間又徙  
鎮安州封蕭國公加兼中書令淳化初杭州以錢氏家  
藏唐梁以來所賜玉冊竹冊各三副鐵券一來上帝悉  
以賜惟濬明年春卒追封邵王

吳越備史  
作祁王謚安僖

惟治字世和廢王侑長子侑初遷於越而惟治生俶養  
為己子授兩浙牙內諸軍指揮使歷遷檢校太保台州  
團練使乾德四年制授寧遠軍節度檢校太傅與惟濬  
節旄同日至從征江南攻下常州以功改奉國軍節度  
使太宗即位進檢校太尉俶兩入京師皆命惟治權國  
事一夕廢中火惟治率兵臨高下視令親信十數輩仗  
劍申令敢後顧者斬頃之火息妻族有隸帳下者恃親  
犯法惟治命扶背於府門俶既納土朝廷命考功郎中



范旻知杭州惟治奉兵民圖籍帑廩管鑰授旻與其弟  
惟演惟灝歸朝改鎮國軍節度使雍熙三年征幽州命  
知真定軍府兼兵馬都部署訓兵享士設厨饌於城門  
以待使傳初惟濬雖倣嫡嗣然倣以其放蕩無檢故器  
惟治俾再權國務倣嘗暴疾孫妃悉斂符鑰付之惟濬  
知之甚恚恨洎入朝惟濬止奉朝請而委惟治藩任焉  
咸平初僮奴以姦私殺人責授右監門衛上將軍晚年  
頗貧匱景德中月給奉錢十萬大中祥符七年卒

按宋史吳

越世家此下有惟濟儼是三人附傳考惟濟惟治在國時已秉旄節事跡顯著仍附入載記惟濟等俱無事實

足錄  
今刪

孫承祐杭州錢塘人俶納其姊為妃因擢處要職累遷鎮海鎮東兩軍節度副使知靜海軍節度事開寶初隨俶子惟濬入貢詔授檢校太保鎮海鎮東等軍行營司馬俶又私署中吳軍節度使後從俶克毗陵功居多詔改中吳軍為平江軍真授承祐節度使俶獻地後徙泰寧軍從幸大名留知府事雍熙二年改知滑州卒承祐

在浙右日恣為奢侈每一飲宴凡殺物率千數雖常膳必數十品所居室中藝龍腦日不下數兩扈從北征以橐駝負大斛貯水養魚自隨其侈肆多類此

沈承禮湖州烏程人鐸辟置幕府署處州刺史鐸子元瓘以女妻之出守台州佐嗣立掌親兵倣襲位命知威武軍節度使充兩浙都鈐轄使從征江南倣遣承禮率水陸數萬人助平毘陵因攻潤州城中兵夜出焚外柵諸將皆欲馳救承禮曰古人有言擊東南而備西北者

此之謂也命士皆擐甲蓐食堅壁不動他壘不設備者

悉驚擾獨承禮所部敵人不敢窺丹陽平遂率兵抵金

陵

按承禮助攻金陵事蹟宋史失載今據十國春秋增輯

時冬至軍中皆聚飲承

禮謂將士曰城中以我節序宴享必不備我宜出不意

圖之乃召敢死士千人焚火薄城下陷其東門士多攀

壘而登江南遂降錄其功真授福州節制俶既獻地徙

鎮密州卒

欽定續通志卷六百

欽定四庫全書

欽定續通志卷六百一

載記八

閩

王審知

延翰

鱗

昶

曦

延政

附

留從効

陳洪進

王審知字信通光州固始人父恁世為農兄潮為縣吏

唐末羣盜起壽州人王緒攻陷固始聞潮與弟審邽審知俱材勇召置軍中以潮為軍校時蔡州秦宗權以緒為光州刺史令會擊黃巢緒遲留不行宗權攻緒緒率衆南奔自南康入臨汀陷漳浦有衆數萬緒軍法毋得攜老弱而潮與二弟奉母以行緒怒欲斬其母三子同辭曰事母猶事將軍也殺其母焉用子為緒赦之會母死不敢哭夜殯道左時望氣者言軍中當有暴興者

按緒

軍法毋得攜老弱以下歐史不載今據新唐書王潮傳增輯

緒性猜忌視部將有材

能者多因事誅之衆懼軍次南安潮說其前鋒將劉行全曰今將吏有材能者必死吾屬不自保朝夕况欲圖成事哉行全大悟乃選壯士數十人伏篁竹間伺緒至躍出擒之囚之軍中緒後自殺行全曰生我者潮也推潮為主潮固辭不得乃除地植劍祝曰拜而劍三動者立之至審知劍躍于地衆以為神皆拜之審知讓潮而自為副潮令于軍曰今天子蒙塵當出交廣入巴蜀以幹王室於是悉師將行

按潮固辭不得以下亦據潮傳增入

會泉州刺史

廖彥若為政貪暴泉人苦之聞潮治軍有法耆老相率遮留潮即引兵圍彥若逾年克之光啓二年福建觀察使陳巖表潮泉州刺史景福元年巖卒其壻范暉自稱留後巖舊將多歸潮言暉可取狀潮遣審知攻暉久不克審知請班師潮不許又請潮自臨軍且益兵潮報曰兵與將俱盡當自往審知懼乃親督士卒攻破之暉見殺是歲唐以潮為福建觀察使潮以審知為副使審知狀貌雄偉常乘白馬軍中號白馬三郎乾寧四年潮卒



審知代立唐以福州為武威軍拜審知節度使累遷同

中書門下平章事封琅邪王

按王潮傳載乾寧中升福州為威武軍即拜潮節度

使檢校尚書左僕射潮病以審知權節度讓審邦不許詔審知檢校刑部尚書節度觀察留後厚事朱全忠全忠薦為節度使通鑑載升福州為威武軍以潮為節度亦在乾寧三年九月審知為節度在光化元年十月據此則武威之升在潮卒之前潮已先秉節旄也與歐史異武威軍額職方考亦然新書及通鑑作威武者誤

梁太祖即位拜中書令封閩王升福州為大都督府時

楊行密據有江淮審知歲遣使汎海自登萊入貢審知

性儉約好禮下士中朝人士多依之又建學四門以教

閩士之秀者招來海中蠻人商賈海上有黃崎波濤為阻一夕雷電震擊開為港閩人以為審知德政所致號為甘棠港同光三年卒諡忠懿追諡曰昭武孝皇帝廟號太祖

延翰字子逸審知長子唐同光四年拜延翰節度使是歲莊宗遇弒中國多故延翰乃取司馬遷史記閩越王無諸傳示將吏曰閩自古王國也不王何待於是軍府將吏上書勸進十月建國稱王而猶稟唐正朔延翰為

人長大美皙如玉其妻崔氏陋而淫審知喪未暮延翰  
多選良家子為妾崔氏輒幽之別室繫以大械刻木為  
人手以擊其頰又以鐵錐刺之一歲中死者八十四人  
審知養子建州刺史延稟本姓周氏自審知時與延翰  
不協延翰立以其弟延鈞為泉州刺史延鈞怒二人因  
謀作亂十二月延稟延鈞皆以兵入執延翰弑之而延  
鈞立

鑄

通鑑  
作鑄

審知次子初名延鈞既立更名鑄唐拜為節

度使累加檢校太師中書令封閩王初延稟與鱗之謀亂也延稟兵先至已殺延翰而鱗兵始至延稟自以養子讓鱗鱗既立延稟還建州鱗餞於郊臨訣謂鱗曰善繼先志毋煩老兄復來鱗銜之長興二年延稟率兵擊鱗攻西門使其子繼雄轉海攻其南門鱗遣王仁達拒之仁達伏甲舟中偽立白幟請降繼雄信之登舟伏發刺殺之梟首西門兵潰執延稟殺之延稟子繼昇守建州聞敗奔錢唐長興三年鱗上書言楚王馬殷吳越王

錢鏐皆為尚書令今皆已薨請授臣尚書令唐不報鏐  
遂絕朝貢鏐好鬼神道家之說道士陳守元以左道見  
信建寶皇宮以居之謂鏐曰寶皇命王少避位後當為  
六十年天子鏐欣然遜位命其子繼鵬權主府事既而  
復位遣守元問寶皇六十年後將安歸守元傳寶皇語  
曰六十年後當為大羅仙人鏐乃即皇帝位受冊于寶  
皇以黃龍見真封宅改元曰龍啓國號閩追尊審知為  
皇帝立五廟置百官以福州為長樂府閩地狹國用不

足以中軍使薛文傑為國計使文傑多察民間陰事致富人罪籍其貲以佐用閩人皆怨又薦妖巫徐彥曰陛下左右多姦臣不質諸鬼神將為亂鱗使彥視鬼於宮中文傑與內樞密使吳英有隙英病在告文傑使彥誣以謀反収英下獄殺之英嘗主兵得軍士心軍士聞英死皆怒是歲吳人攻建州鱗遣其將王延宗救之兵士不肯進曰得文傑乃進鱗惜不與其子繼鵬請與之以紓難乃以檻車送軍中軍士磔文傑於市明日鱗赦至

已不及龍啓三年改元永和王仁達以殺延稟功典親  
兵鱗忌之嘗問仁達曰趙高指鹿為馬以愚二世果有  
之邪仁達曰秦二世愚故高指鹿為馬非高能愚二世  
也今陛下聰明朝廷官不滿百動靜皆知之敢有作威  
福者族之而已鱗慙賜金帛慰安之退謂人曰仁達智  
略在吾世猶可用不可遺後世患卒誣以罪殺之鱗妻  
早卒繼室金氏賢而不見答審知婢金鳳姓陳氏鱗嬖  
之立為后陳氏與嬖吏歸守明百工院使李可殷私通

鱗婢春燕有色其子繼鵬烝之鱗病風疾繼鵬因陳氏  
求春燕鱗快快與之次子繼韜怒謀殺繼鵬繼鵬懼與  
皇城使李倣圖之是歲十月饗軍於大酺殿鱗言見延  
稟來倣以為鱗病甚令壯士先殺李可殷于家明日晨  
朝鱗無恙詰可殷死狀倣懼而出與繼鵬率皇城衛士  
入衛士刺鱗不死宮人不忍其苦為絕之陳氏及繼韜  
歸守明皆為倣所殺諡曰惠皇帝廟號太宗

按通鑑作  
諡曰齊肅

明孝皇帝廟號  
惠宗與國史異



昶鱗長子初名繼鵬既立更名昶改元通文以李倣判  
六軍諸衛事倣既弑鱗心疑懼不自安多養死士為備  
昶患之因大享軍伏甲執斬之梟首於市倣部兵千人  
叛燒啟聖門奪倣首奔錢唐晉天福二年昶遣使朝貢  
京師晉高祖遣散騎常侍盧損冊封昶閩王拜其子繼  
恭臨海郡王損至閩昶稱疾不見令繼恭主之損還昶  
無所答繼恭遣其佐鄭元弼隨損至京師貢方物致書  
晉大臣述昶意求以敵國禮往來高祖怒下詔暴其罪

歸其貢物不納以元弼下獄尋赦之遣歸昶亦好巫拜道士譚紫霄為正一先生又拜陳守元為天師而妖人

林興以巫見幸事無大小興輒以寶皇語命之而後行

四年夏

按十國春秋宮中虹見以下皆係通文四年三月以後事昶遇害在四年七月考昶稱通文四

年乃晉天福四年也通鑑載此數事亦在天福四年歐史於此作三年夏後又云是歲夏術者言宮中當有災則並作三年事顯宮中虹見林興傳神言此宗室將為

係訛誤今改正

亂之兆也乃命興率壯士殺審知子延武延望及其子五人後興事敗亦被殺而昶愈惑亂立父婢春燕為皇

后又遣醫人陳究以空名堂牒賣官昶弟繼嚴判六軍

諸衛事昶疑而罷之代以季弟繼鏞

按通鑑作繼鏞

募勇士為

宸衛都以自衛其賜予獨厚於他軍控鶴都將連重遇

拱宸都將朱文進皆以此激怒其軍是歲夏術者言宮

中當有災昶徙南宮避災而宮中火昶疑重遇軍士縱

火內學士陳郊以便佞為昶所親信昶語之郊反以告

重遇重遇懼夜率衛士縱火焚南宮昶挾愛姬子弟黃

門衛士斬關出宿于野次重遇迎延義立之延義令其

子繼業率兵襲袒繼業弑之及其妻子皆死無遺類諡曰聖神英睿文明廣武應道大弘孝皇帝

按歐史不載袒諡號今據

通鑑補入廟號太宗

曦審知少子初名延義既立更名曦遣使朝貢於晉改元永隆鑄大鐵錢以一當十泉州刺史余廷英嘗矯曦命掠取良家子曦怒召下御史劾之廷英進買宴錢十萬又獻皇后錢十萬乃得不劾曦嘗嫁女朝士有不賀者笞之御史中丞劉贊坐不糾舉將加笞諫議大夫鄭

元弼切諫曦曰卿何如魏鄭公乃敢強諫元弼曰陛下  
似唐太宗臣為魏鄭公可矣曦喜乃釋之曦弟延政為  
建州節度使封富沙王與曦有隙數舉兵相攻曦由此  
盡戮宗室諫議大夫黃峻極諫貶漳州司戶參軍校書  
郎陳光逸上書疏曦惡過五十餘事曦命衛士鞭數百  
不死懸頸於木久乃絕國計使陳匡範增算商之法以  
獻曦曰匡範人中寶也已而歲入不登其數借於民以  
足之匡範以憂死曦後知之剖棺斷尸棄水中曦性既

淫虐妻李氏悍而酗酒賢妃尚氏有色而寵李仁遇曦甥也以色嬖之用以為相曦常為牛飲羣臣醉不勝有私棄酒者輒殺之連重遇弑昶懼為國人所討與朱文進連姻以自固曦心疑之常誚重遇等李氏妒尚妃之寵欲圖曦而立其子亞澄乃使人謂重遇等曰上心不平於二公奈何重遇等懼六年三月曦出遊醉歸遣壯士拉於馬上而弑之謚曰睿文廣武明聖元德隆道大孝皇帝

按曦謚號歐史亦不載今據通鑑補入

廟號景宗

延政

丹府元龜  
作延正

審知子曦立肆為淫虐延政數貽書諫

之曦怒遣杜建崇監其軍延政逐之曦乃舉兵攻延政  
為延政所敗延政乃以建州建國稱殷改元天德明年  
朱文進連重遇已弑曦文進自立為閩王以重遇判六  
軍諸衛事王氏子弟在福州者無少長皆殺之以黃紹  
頗守泉州程贇守漳州許文鎮守汀州稱晉年號時開  
運元年也泉州軍將留從効倡率州人共殺紹頗於是  
漳州聞之亦殺贇而文鎮懼以汀州降延政延政已得

三州重遇亦殺文進傳首建州以自歸福州裨將林仁翰又殺重遇謀迎延政都福州時南唐李景聞閩亂發兵攻之延政遣其從子繼昌守福州而南唐兵方急攻延政福州將李仁達謂其徒曰唐兵攻建州富沙王不能自保其能有此土邪乃殺繼昌欲自立懼衆不附以僧卓儼明示衆曰此非常人也被以袞冕率諸將吏北面事之已而殺儼明自立送款于李景景以仁達為武威軍節度使其名曰弘義而景兵攻破建州延政出



降遷其族於金陵封鄱陽王徙封光山王是歲景保大

四年也

徐無黨曰晉開運三年丙午南唐保大四年也是歲李景兵破建州王氏滅江南錄云保大三

年據王氏之族遷於金陵謬也據王潮實以唐景福元年入福州拜觀察使而後人紀錄者乃用騎馬來騎馬去之識以為據遂以王潮光啓二年歲在丙午拜泉州刺史為始年至保大四年歲復在丙午而滅故為六十五年然其奄有閩國則當自景福元年為始實五十五年也今諸家紀其國滅丙午是也其始年則牽於讖書謬矣惟江南錄又差其末年也

留從効

宋史作從效今據歐史

泉州永春人幼孤事母兄孝悌聞

朱文進弒延義據其位以黃紹頗守泉州時從効方為

泉州散指揮使與其黨王忠順等謀興復王氏從効倡言吾等皆受王氏恩遇今聞建州士卒謀盡力擊福州以復王氏苟一旦功先成我輩何面目見之邪於是募敢死士得陳洪進等五十二人夜持白梃踰城而入劫庫兵擒紹頗斬之立延政從子繼勲為刺史從効等自署為統帥洪進等皆為指揮使繼勲令送紹頗首於建州奉延政為主延政遂送款於李景會景遣將圍福州兩浙錢氏發兵來援福州入於錢氏從効以兵劫繼勲

送江南景即以泉州為清源軍授從効節度泉漳等州  
觀察使閩中五州自此分矣後累封至晉江王從効知  
人疾苦在郡專以勤儉養民為務民甚愛之王氏有二  
女嫁為郡人妻從効奉之甚謹資給豐厚歲取進士明  
經謂之秋堂周世宗征淮南江北地盡入中朝從効遣  
使問道奉表修貢世宗嘉納之又乞置邸京師世宗以  
其素附江南不許宋初上表稱藩貢奉不絕太祖命使  
厚撫之使未至從効疽發背卒從効無嗣以兄從願子

紹鉞紹鑑為子從効寢疾時從顧守漳州紹鉞在金陵  
紹鑑尚幼衙校張漢思陳洪進等率兵劫從効遷東亭  
漢思自稱留後洪進為副使時建隆三年也明年洪進  
廢漢思自立

陳洪進泉州仙遊人幼習兵法及長以材勇聞隸兵籍  
從攻汀州以功補副兵馬使從留從効殺黃紹頗將送  
首建州羣下以道阻賊盛皆憚行洪進獨請往至尤溪  
賊數千人遮道不得前洪進紹賊曰福泉二州已為義

師所襲爾輩復為何人戍守即持紹頗首示之曰送此  
於建州迎嗣君以歸國爾賊遂潰渠帥數人皆聽命至  
建州延政大悅以為本州馬步行軍都校時晉開運元  
年也未幾遣歸泉州從効劫王繼勳降江南景以從効  
為清源軍節度洪進為統軍使與副使張漢思同領兵  
柄從効卒洪進推漢思為留後自為副使漢思年老軍  
務皆決於洪進漢思諸子並為衙將頗不平漢思亦患  
其專因大享將吏伏甲將害洪進酒數行地忽大震同

謀者以告洪進亟去衆驚散自是更相為備一日洪進袖大鎖安步入府中漢思方處內齋洪進鑄其門使人叩門謂漢思曰郡中軍吏請洪進知留務衆情不可違當以印見授漢思惶懼不知所為即自門間出印與之洪進即日以兵遷漢思別墅遣使請命於李煜煜即以為清源軍節度泉南等州觀察使時宋太祖平澤潞下楊州取荆湖洪進大懼遣衙將魏仁濟間道奉表聽朝旨太祖賜詔安撫又以其素附江南再諭李煜不必以

彼此為意煜亦聽命自後屢遣使朝貢乾德二年制改清源軍為平海軍仍授洪進節度使加檢校太傅以其子文顯為節度副使文顯為漳州刺史洪進每歲以修貢朝廷多厚斂於民第民貲百萬以上者令差入錢以為試協律奉禮郎蠲其丁役及江南平吳越王來朝洪進不自安遣其子文顯入貢太祖因下詔召之遂入覲至南劍州聞太祖崩歸鎮發哀太宗即位加檢校太師明年來朝表獻所管泉州兩郡優詔嘉納之遂以為武

寧軍節度使同平章事留京師奉朝請諸子皆授近郡  
太平興國四年從平太原六年封杞國公雍熙元年進

封岐國公二年卒贈中書令謚忠順

按宋史閔世家此下有文顯文顯文

顯三人傳俱無事跡足錄今從刪

欽定續通志卷六十一



欽定四庫全書

欽定續通志卷六百二

載記

九

南平

高季興

從誨

保融

保勗

繼冲

附

孫光憲

梁延嗣

高季興字貽孫陝州硤石人本名季昌避後唐獻祖廟諱更名季興少為汴人李讓家僮梁太祖養讓為子賜

姓名曰朱友讓季興因得進見太祖奇其材命友讓以

子畜之乃冒姓朱氏補制勝軍使遷毅勇指揮使

通鑑作親

從指揮使

天復二年梁兵攻鳳翔李茂貞堅壁不出太祖議

欲還軍季興獨進曰天下豪傑窺此舉者一歲矣今岐

人已憊破在旦夕而堅壁以老我師此可以誘致也太

祖壯其言命季興募敢死士得騎士馬景季興授以計

引見太祖景曰此行無還理願錄其後太祖許之景乃

以數騎馳叩城門告曰梁兵將東前鋒去矣岐人以爲

然開門出追梁軍梁兵隨景進殺其九千餘人景死之  
季興由是知名明年拜宋州刺史從破青州徙潁州防  
禦使復姓高氏天祐二年梁兵破襄州趙匡凝奔吳其  
弟荆南留後匡明奔蜀乃以季興為荆南節度觀察留

後

按曾鞏隆平集及王稱東都事畧云唐末荆南司馬張瓌逐其節度使陳儒自稱留後瓌敗而季興守荆

南考新唐書陳儒傳瓌逐儒及秦宗權遣趙德諱攻敗之在僖宗中和間而德諱據襄州傳子匡凝至天復三

年匡凝始遣其弟匡明據荆南天祐二年奔蜀二書謂瓌敗而季興即守荆南似不足據惟通鑑云天祐二年梁兵破襄州匡凝兄弟出奔九月以都將賀瓌為荆南留後會武貞節度使雷彥威屢寇荆南瓌不能守三年

十月乃以潁州防禦使高季興代之與十國春秋所載同據此則季興為荆南留後亦非匡明奔蜀後即授也

均與歐

史異 開平元年拜節度使

按三楚新錄作拜江陵尹兼管節度觀察處置等使

二年加同平章事荆南節度十州唐末為諸道侵削所治惟江陵一城而已兵火之後季興招緝綏撫人咸歸之太祖崩季興見梁日衰弱乃謀阻兵自固治城隍設樓櫓以兵攻歸峽侵襄州絕貢賦者累年末帝優容之封季興渤海王賜以袞冕劍佩貞明三年始復修貢梁亡唐莊宗入洛下詔慰諭其客司空薰等勸季興入朝

獨梁震不可曰梁唐世為仇敵大王梁室故臣握彊兵  
居重鎮以身入朝行為擄爾季興不聽以騎士三百為  
衛朝于洛陽莊宗果欲畱之郭崇韜諫乃止厚禮遣之  
莊宗嘗問季興曰吾已滅梁欲征吳蜀何者為先季興  
曰宜先蜀臣請以本道兵先進莊宗大悅及已去莊宗  
心頗悔乃密詔襄州劉訓圖之季興行至襄州心動夜  
斬關出已去而詔書始至季興歸謂梁震曰不聽子言  
幾不免因曰吾行有二失來朝一失放還一失且主上

百戰以取河南對功臣誇手抄春秋又曰我於手指上得天下其自矜伐如此而荒于遊畋政事多廢吾無慮

矣同光三年封南平王

按陶岳五代史補作同光二年封季興南平王並加兼中書令

魏王繼岌已破蜀得蜀金帛四十餘萬自峽而下會莊宗難作季興聞變乃悉邀留蜀物殺其使者韓珙等十餘人初唐兵伐蜀季興請以本道兵自取夔忠萬歸峽等州乃以季興為峽路東南面招討使而季興未嘗出兵魏王破蜀明宗入立季興屢請以夔忠等州為屬郡

唐大臣皆以為不可明宗不得已與之而猶自除刺史

季興拒不納明宗乃以襄州劉訓為招討使攻之不克

而唐別將西方鄴克其夔忠萬三州季興遂以荆歸峽

三州臣于吳

按五代史西方鄴傳云鄴服夔忠萬三州已而又取歸州數敗季興兵是季興以地

歸吳祇有荆峽二州也

吳冊季興秦王天成三年卒謚曰武信

從誨字遵聖季興長子季興時仕梁賜告歸省遂畱為

馬步軍都指揮使行軍司馬季興卒吳以從誨為荊南

節度使從誨以父自絕于唐懼復見討乃聘于楚楚王

馬殷為請命于唐而從誨亦遣押衙劉知謙奉表自歸  
明宗納之長興元年拜從誨節度使追封季興楚王封  
從誨渤海王應順元年封南平王從誨明敏多權詐晉  
高祖遣翰林學士陶穀為從誨生辰國信使從誨宴穀  
望沙樓大陳戰艦于樓下謂穀曰吳蜀不賓久矣願修  
武備習水戰以待師期穀還具道其語晉高祖大喜復  
遣使賜甲馬百匹襄州安從進反結從誨為援從誨外  
為拒絕陰與之通晉師致討從誨遣將季端以舟師為



應從進誅從誨求郢州為屬郡不許漢高祖起太原從  
誨遣人間道奉表勸進且言漢得天下願乞郢州為屬  
高祖陽諾之卒亦不與從誨怒發兵攻郢州為刺史尹  
實所敗漢遣國子祭酒田敏使楚假道荆南從誨問敏  
中國虛實以為契丹之後兵食皆殫意欲以誚敏敏言  
杜重威悉以晉戈甲降契丹契丹置之鎮州未嘗以北  
故晉兵皆漢有也從誨不悅敏以印本五經遺從誨從  
誨謝曰予之所識不過孝經十八章爾敏曰至德要道

於此足矣為誦諸侯章制節謹度數言從誨以為譏已  
以大庖罰敏荆南地狹兵弱介於吳越為小國自吳稱  
帝而南漢閩楚猶奉梁正朔歲時貢奉皆假道荆南季  
興從誨常邀畱使者掠取其物而諸道以書責誚或發  
兵加討即復還之而無媿從誨自求郢州不得遂自絕  
於朝廷逾年復通朝貢乾祐元年卒諡曰文獻

保融

馬令南唐書作保庸

字德長從誨第三子從誨時為節度副

使兼峽州刺史從誨卒拜節度使廣順元年封渤海郡

王顯德元年進封南平王世宗征淮保融遣指揮使魏  
璘率兵三千出夏口為應又遣客將劉扶奉牋南唐勸  
其內附李景稱臣世宗得保融所與牋大喜賜絹百匹  
荆南自後唐以來數歲一貢京師及世宗時無歲不貢  
保融以器械金帛皆土地常產不足以効誠節乃遣其  
弟保紳來朝世宗益嘉之初季興之鎮有牙兵五千衣  
食皆仰給於梁至明宗時歲給鹽萬三千石後不復給  
及是命泰州復給之保融性迂緩無材能事無大小皆

委其弟保勗其從叔從義謀為亂為其徒高知訓所告徙松滋殺之宋興保融懼一歲三入貢建隆元年卒謚曰貞懿

保勗字省躬從誨第十子晉天福初領漢州刺史保融立令判內外諸軍事周顯德初從保融請累加檢校太尉充行軍司馬領寧江軍節度保融卒即拜荆南節度使建隆二年遣其弟保寅入貢歸勸保勗奉土歸朝不聽保勗淫佚無度又好營造臺榭窮極工巧軍民咸怨

政事不治及寢疾謂其將梁延嗣曰我疾終不起兄弟孰可付後事者延嗣曰公不念貞懿王乎先王寢疾以軍府付公今先王子繼冲長矣保勗即以繼冲判内外兵馬十一月保勗卒

繼冲字成和

宋史及東都事畧作字贊平

保融長子保勗卒拜節度

使時湖南張文表作亂周保權求救於朝廷建隆四年宋太祖命慕容延釗等討之假道荆南約以兵過城外繼冲大將李景威請嚴兵待之判官孫光憲叱之曰汝

峽江一民爾安識成敗且中國自周世宗時已有混一天下之志今真主受命王師豈易當也因勸繼冲去斥堠封府庫以待景威出而歎曰吾言不用大事去矣何用生為因扼吭而死延釗軍至繼冲出逆于郊而前鋒遽入城繼冲亟歸見旌旗甲馬布列衢巷大懼即詣延

釗納牌印太祖優詔仍命繼冲為節度使

按宋史繼冲歸朝後始授

武寧軍節度使當奉表納土時太祖下詔安撫止云授繼冲馬步都指揮使而不言復為節度與歐史異三楚

新錄又云繼冲出迎王師且乞入朝太祖遂遣使就除繼冲徐川節度使便道赴任考徐川舊武寧軍而綱目

載慕容延到入荆南繼冲奉表納王授荆南節度使如  
故至以為武寧軍節度使則在乾德元年十月所載與  
歐史並同新錄未足為據 乾德元年將郊祀繼冲表求入覲可之九

月率其將吏宗族五百餘人朝京師拜武寧軍節度使

光憲等皆拜官有差保勗開寶六年卒

徐無黨曰季興  
興滅年世甚明

諸書皆同蓋自梁開平元年鎮荆南至宋乾德元年國  
除凡五十七年按宋史荆南世家此下有保寅附傳  
保寅勸保勗歸朝事已附  
見載記餘無足錄今從刪

孫光憲字孟文陵州貴平人

北夢瑣言  
作富春人

世業農光憲少

好學游荆渚高從誨署為從事歷保融及繼冲三世皆

在幕府累官檢校秘書監兼御史大夫慕容延釗等假道荆南繼冲開門納延釗光憲勸獻三州地宋太祖嘉之授黃州刺史在郡有治聲乾德中宰相有薦光憲為學士者未及召卒光憲博通經史尤勤學聚書數千卷或自抄寫孜孜讎校老而不廢好著譔自號葆光子所譔續通歷紀事頗失實太平興國初詔毀之

梁延嗣京兆長安人

三楚新錄作復川果陵人

少事高季興頗見委

任表授檢校司空領綿州刺史充衙內馬步軍都指揮



使

按三楚新錄及上國春秋載延嗣唐同光中守復州監利李興朗唐莊宗欲陰圖之既疾趣歸遂以兵攻

監利星沙二縣延嗣敗為李興所獲從誨立擢為太校授歸州刺史進復州團練使仍掌親軍此作少事李興

頗見委任則與二書所載不合未詳孰是歷事四世人稱其忠蓋繼冲之納

土也延嗣亦嘗勸之授復州防禦使後因郊禮自復州

入朝太祖慰撫之曰使高氏不失富貴爾之力也改濠

州有善政開寶九年卒

欽定續通志卷六百二